

皇明典故紀聞

皇明典故紀聞卷十一

交河 余繼登 緝

臨朐 馬琦 訂

新城 王象乾 校

英宗初卽位勅省諸冗費於是禮部尚書胡濱等議欽天監曆日五十萬九千七百餘本省爲十一萬九千五百餘本太醫院藥材九萬八千一百餘斤省爲五萬五千四百餘斤光祿寺糖蜜果品減舊數三之二其添造膳臘

雞鶩猪羊二萬七千隻子鶩二千隻酥油四  
千斤盡行革罷厨役六千四百餘名揀選老  
疾者悉皆放回湖廣江西等處薦新茶芽七  
千五百餘斤省爲四千斤

英宗初卽位勅工部曰洪武永樂間各處府縣  
歲貢綵段工部驗中方送內庫且無賄囑及  
包攬之弊故皆精密鮮明足稱朝廷賞賚亦  
不虛費百姓財力近年以來徒見糜費民財  
而段疋多不堪用此皆有司通同工匠侵盜

易換且聽人包攬解納及至京該部該庫官  
吏人等又從而求取賄賂一得其利遂不辨  
美惡悉送內庫此積年之弊也今特命司禮  
監取洪武末樂閒紵絲紗羅綾絹之類與爾  
工部及各布政司府縣務以此爲式成造其  
起送至京令監察御史同爾工部官辨驗仍  
委司禮監官叅視敢有漫不知省仍蹈前弊  
者通治以重罪不宥

○宣德十年十一月朔當進正統元年大統曆

以是日日食移於十二月朔

○正統初大學士楊士奇等言國家歲用糧餉浩大皆仰給江南軍民轉運不勝勞苦況河道難通少有阻隔則糧餉不足實非長久之計今在京官軍數多除操練造作應用外餘者悉令於北京八府空閑田地屯種倘遇豐年必有蓄積可省南方轉遞之費此實國家經久長策於是撥京軍三萬就近地下屯  
○正統初湖廣布政司檢校程富言夷狄爲患

自古有之若處之輦轂之下寵以崇高之位  
其能據誠盡節如金日磾萬無一二忠愛勤  
勞如僕固懷恩尚不克終至於桀黠難馴如  
劉淵之儔殆不可繆數往事甚明皆足爲鑒  
今歸順達官人等日累月增動以萬計固難  
阻嚮化之心亦當防未然之患乞勅兵部將  
新降附者量賜齋裝遣往江南衛所旣省京  
師之廩食且杜華夏之厲階

○永樂中以駝駢溫煖令內官於所出地方索

買且令專業者給官料織造五十疋自後歲以爲常至正統初陝西右叅政年富奏本司原造綾絹襪靴九百餘疋復加造駝駒五十疋民力不堪乞免造從之

○正統元年三月擢一甲進士周旋爲修撰陳文劉定之爲編修賜羊酒宴於本院

○正統元年九月尚書胡濙自劾不謹失行在禮部之印

英宗不問爲更造之改其文曰行禮部印

○正統初以兩京御史及天下知縣缺人令在京三品以上官各舉廉潔公正明達事體堪任御史者一員在京四品官及國子監翰林院堂上官各部郎中員外郎六科掌科給事中各道掌道御史各舉廉慎明敏寬厚愛民堪任知縣者一員

○正統初有繼母告陷前妻之子法司問擬不孝重罪大理寺評事吳亮駁奏冤抑英宗勅法司今後繼母告陷前妻之子嫁母告

陷前夫之子不孝者俱令隣佑保實取問如  
律如有冤枉卽與辯之著爲令

○正統初吏部主事李賢言切見京師達人不  
下萬餘較之畿民三分之一其月支俸米較  
之在朝官員亦三分之一而實支之數或全  
或半又倍蓰矣且以米俸言之在京指揮使  
正三品該俸三十五石實支一石而達官則  
實支十七石五斗是贍京官十七員半矣邊  
軍常居苦寒之地其所以保妻子禦饑寒者

月糧而已糧不足以贍其所需欲其守死不可得也今若去此達官歲省數十萬之費可以全生民之命可以贍邊軍之給可以足京官之俸利莫大焉臣又惟夷狄人面獸心貪而好利乍臣乍叛恍惚無常彼來降者非心悅而誠服也實慕中國之利也且達人在胡未必不自種而食自織而衣今在中國則不勞其力而坐享其有是故其來之不絕者中國誘之也誘之不衰則來之愈廣一日邊備

有警其勢必不自安矣前世五胡之亂可不鑒哉乞勅兵部將達官漸次調除天下各都司衛所彼勢既分必能各安其生不惟省國家萬萬無益之費而又消其未萌之患矣

○天台魯穆由御史爲福建僉事剛方廉介理冤繩奸執法無私人目爲魯鐵面後爲僉都御史卒之日同朝卿士咸贈助具棺斂焉

○雲南晉寧州塔墩有大樹頗著靈異土人號爲塔墩聖母永樂時大風折其樹軍人陳福

海鉅以爲板內有神象戴冠執簡容貌如畫人皆驚異立祠以祀正統初州官請加封號英宗謂禮部臣曰淫祀徼福非禮也聖見之不惑如此

○正統初達官軍校人等居畿甸者多占民田掠民財御史成規以爲言

英宗詔錦衣衛兵馬司分捕之犯死者於犯所梟首徒流者發邊衛充軍仍罪其頭目若地方被劫奪而官校縱容者重治以罪

○正統二年勅諭尚膳監及光祿寺曰比聞進宮中食物所用器皿扛索十還一二光祿寺不以奏尚膳監不以言重復造用甚費財擗民今後凡進食物必須印信揭帖備書器皿扛索之數與收領內官姓名尚膳監如數還之不足卽以奏聞敢隱瞞扶同者悉坐以罪復勅宮中六尚司知之

○正統初勅工部曰今軍器缺用爾工部會同五府兵部錦衣衛司禮監內府各監局徃年

退出諸色軍匠擇其精壯者令在營操備老  
弱者仍送原衙門與見在匠役成造軍器爾  
工部司禮監各遣官提督務在堅利使可經  
久宜用物料在京各庫支用勿復科派有司  
擾民每季仍以造完數目具奏以憑稽考不  
得通同作弊假公營私以取罪戾

(6) 正統二年九月早朝鍾旣鳴有京衛指揮張  
勝等八人潛坐闕右門爲給事中所劾皆謫  
戍邊衛

○先是進表官無定例正統二年十月始從禮部言自今惟聖節表令三司堂上官躬進正旦冬至遣首領及所屬佐貳官代行遂爲例

○故事享廟奏祭皆御殿受奏正統三年春祭奏祭日正遇

宣宗忌辰禮部請於西角門視事

英宗以祭祀重事仍宜升殿

○正統初刑部申明舊制凡民訐官長宜量加

責罰不許撫拾妻妾幼女幸其受辱以快私忿凡婦女非犯姦惡殺人及毀罵公姑不孝等罪並免提問

○正統三年山東東平州知州傅霖言 皇上肇登寶位却珍奇之獻罷不急之征命巡撫侍郎督糧儲命監察御史清軍政一切內臣悉取回京天下官民莫不沐浴 聖澤歡欣踊躍以爲堯舜之治復見于今日然臣切見徐州臨清等倉仍用內官收糧淮浙等處鹽場

仍遣內官并錦衣衛官校緝捕以臣愚見各處收糧自有州縣官員巡鹽已有監察御史凡有規避律具明憲又何用內臣并錦衣衛官校以瘠民膏血而駭民耳目乎

英宗嘉納之

○正統初三氏學教授裴侃言天下文廟惟論傳道以列位次闕里家廟宜正父子以叙彝倫顏子曾子子思子也配享殿庭無繇子晉伯魚父也從祀廊廡匪惟名分不正抑恐神

不自安況孔子父叔梁紇元已追封啓聖王  
創殿於大成殿西崇祀而顏孟父俱封公爵  
惟伯魚子晳仍爲侯爵乞追封爲公偕顏孟  
之父俱遷配啓聖王殿庶名位胥安人倫攸  
叙

英宗是其言命禮部行之

正統三年四月以監試歲貢生員不嚴致有  
商議及易卷之弊下編修謝璉及監察御史  
趙全等於錦衣衛獄當時之嚴於廷試如此

○正統三年五月御史鄭顥奏張家灣宣課司崇文門分司每遇商貨販到積至數多方差內官錦衣衛官抽盤不無停滯損壞張家灣宜專委內官抽分崇文門宜令本門收鈔內官兼管其順天府都稅司并塌房課鈔宜令順天府置簿按季填報以憑稽考

英宗命但戒所司勿致停滯不必專委內官

○正統三年八月初九日晚順天府科場失火焚東南席舍并對讀所延及廳事而止府尹

姜濤暨御史時紀等上章請罪

英宗特宥之命於本月十五日爲始再試

正統三年十二月

英宗諭都察院臣曰比聞閩辦銀課擾民已皆停罷封閉各處坑穴禁人煎採近聞浙江福建等處有等頑猾軍民不遵法度往往聚衆偷開坑穴私煎銀鑛以致互相爭奪殺傷人命爾都察院卽揭榜禁約今後犯者卽令該管官司拏問具奏將犯人處以極刑家遷化

外

○正統四年

英宗問戶部臣永樂宣德間宣府大同二邊糧供給若何及有無運送銀絹布疋之數戶部言國初大同糧料俱係山西布政司供給永樂十九年方起倩軍夫於京倉運送糧料二十萬一千一百餘石於宣府宣德六年至十年亦於京倉通州儕運糧料三十八萬石赴宣府其山西稅糧歲止撥四十萬石或三

十萬石赴宣府備用並無運送銀兩布絹其後宣府陸續添設保安等衛所通舊八衛共一十九衛所官軍數多於是每年奏令糧戶齎價於松江等處收買布疋或遣人解銀前去准織或出京庫絹運彼准作官軍月糧此皆權時制宜以足邊防之用也

○正統四年十月有竊瓦刺貢使銀物者獲之命斬於會同館以徇

○正統初成國公朱勇言在京文武官員俸糧

每月關米一石食用不敷乞每年運糧除正數外每軍增米二石至京文武官按月添米一石

英宗以帶運艱難不欲重困軍士止而不行

○正統五年朵顏衛都指揮同知朵羅干遣使朝貢還易得犁鏵爲關隘所阻不得出

英宗謂兵部臣曰遠人當懷柔農具故未有禁聽其歸勿阻

○正統時勅諭文武百官內一段言朝廷於百

司設正佐官俾共理政事凡正與佐皆當以誠相與有善相輔有過相規彼此協和事乃有濟不可專恃已見不采衆善屬官中賢者須禮之不及者須教之不肖者須明其罪黜之如或悅諂諛納浸潤則賢者受抑不肖者得志孰與成功爾大臣宜體朕心表率羣僚欽哉

○正統五年用大學士楊士奇言遣侍郎何文淵等往各省直修備荒之政賜之勅條列合

行事宜一見今官司收貯諸色課程并贓罰等項鈔貫雜物可以貨賣者不拘稻穀米粟二麥之類貿易儲積並須照依時值不許虧官損民凡州縣所積預備穀粟須計民多寡約量足以備用如本處官庫見儲鈔物不敷於本府官庫或本布政司官庫支買如又不敷移文戶部奏聞處置一凡丁多田廣及富實良善之家情愿出穀粟於官以備賑貸者悉與收受仍具姓名數目奏聞一糴糧在倉

須立簿籍二扇備書所積之數用州縣印鉛  
記一在州縣收掌一付看倉之人但遇饑荒  
百姓艱窘卽便賑貸並須州縣官一員躬親  
監支不許看倉之人擅放二處簿籍放支之  
後並將實數具申戶部所差看倉須選有行  
檢老人富戶就兼收支不許濫設一洪武年  
間所置預備倉糧多由州縣不得其人視爲  
泛常全不留意以致土豪奸民盜用穀粟捏  
作死絕逃亡人戶借用虛寫簿籍爲照是以

倉無顆粒之儲甚至折毀倉屋間遇饑荒民無所賴深負祖宗仁民之心爾等於所屬府州縣並須親歷查勘前項官倉糧儲原數實在幾何百姓借用未還虧折幾何務要根究的實着落前後經手人戶供報追價不許聽其詭詐指扳死絕逃亡人戶塘塞遮掩追完之後令照例納米贖罪若限外不完者毋論赦前後械赴京師發戍遼東邊衛一比先所建預備倉廩或爲豪民所據責令還官或

年深毀壞量加修葺其倒塌不存者官爲起  
蓋如本處有空閑官房許令折用並須完固  
可以經久一洪武年間於各州開濬陂塘以  
防水旱蓋永遠之利亦因後來有司不得其  
人視農事如等閑委而不問以致土豪奸民  
掩爲已有或湮塞爲田爾等須一一親歷踏  
勘如有前弊責令自備工力如舊脩築堅固  
還官悉免其罪如隱占不還及違限不卽脩  
築者亦械赴京發戍遼東邊衛一凡各處閘

壩陂堰堺田濱江近河堤岸有損壞當脩築者先計工程多寡於農隙之時量起人夫用工程多者先修緊要之處其餘以次用丁不許迫急其起集人夫務在受利之處驗其丁力均平差遣毋容徇私作弊凡所作工程務在堅固經久不許苟且府縣正佐官時常巡視毋致損壞一各處陂塘圩岸果有實利及衆比先有司失於開報許令開陳利民之實踏勘明白畫圖貼說具申工部定奪如利

不及衆不許虛費人力一但遇近經水旱災傷去處預備之事宜斂停止待豐年有收依例整理一所過州縣倉廩穀粟克實陂塘隄岸完整者必其正佐之官得人若有空虛廢壞等項其正佐之官必不得人悉具名奏聞如或貪酷虐民驗有實跡就便拿問一今後府州縣官考滿赴吏部者並須開報預備官倉所儲實數及脩築過陂塘隄岸等項吏部行該部查考虛實以憑黜陟事完回京仍將

所備穀粟及所脩陂塘圩岸閘壩備細造冊具奏遇有興利除害之事難以處置者具奏來聞

○正統間山東樂陵縣築倉起土得白金九錠重三百九十餘兩有司以聞

英宗命易糧貯倉以賑貧乏

○正統五年有僧年九十餘自雲南至廣西給人曰我建文也張天師言我有四十年苦今爲僧期滿宜亟返邦國以黃紙爲書令其徒

清進持詣恩府土官知府岑瑛執送總  
兵官柳溥械至京會官鞫之乃言其姓名爲  
楊行祥河南鈞州白沙里人洪武十七年一度  
爲僧歷遊兩京雲南貴州至廣西

英宗命錦衣衛錮禁之凡四踰月死獄中其同  
謀僧十二人俱謫戍遼東邊衛

○正統時司禮監火者賈麥兒以私事囑吏部  
尚書郭璡戶部尚書劉中敷皆從之事覺  
英宗命宥璡中敷戒勿再犯麥兒送法司論如

律枷示於司禮監之新房

○正統五年歲暮勅文武羣臣曰昨欽天監言正統六年正月朔日食凡九十一秒故事食不一分为者不救護朕惟事天之誠雖微必謹敬天之變豈以微怠況茲歲始陽德方亨致災有由敢忘祗畏是日在京文武羣臣悉免賀禮及期救護如制

○正統時廣東南海衛指揮曹忠等送占城國進貢犀象赴京一犀道死禮部請治忠不謹

之罪

英宗特宥之

○巡撫左侍郎于謙言臣奉命總督河南山西二處預備糧儲今在倉各以數百萬計第恐有司不謹復如前日他處事體臣欲於每歲三月初令州縣記其缺食之家布達布按二司斟酌得宜方令支給其所給者大口月三斗小口半之至五月蠶麥旣收隨卽住支仍將所給之數申報上司及戶部候秋成抵斗

償官歲終仍報所償之數果有貪之及篤廢老疾不能償者官爲設法補完毋損原數其放支之序先菽次薺次黍次黍麥次米稻後先有倫毋致紅腐州縣官有能設法經營使新陈相易不致浥壞者聽當滿而預備糧儲未完者不得離任仍令風憲官稽考伺察如此則出納以時而所貯不腐防閑嚴密而奸弊不生從之

○正統中御史彭勗疏言僧道二害請凡僧尼

未度者皆令還俗叢林不許創立官民之家  
不許修齋設醮事下禮部都察院尚書胡濱  
等查洪武間禁約條例入奏

英宗命都察院遵例禁約違者依律罪之寺觀  
有賜額者聽其居住今後再不許私自創建  
○正統六年四月成國公朱勇等奏准選驍勇  
都指揮等官紀廣等五十一員熟閑騎射幼  
官趙廣等一百員至是

英宗命置學授官以訓誨之除教授一員訓導

六員此京衛武學之始

正統中漢中府石泉縣教諭黃士文言本縣民止一里五十六戶每春秋祭文廟用猪羊五十四隻帛三十六段措辦實難下禮部覆議凡州縣不及三里者春秋二丁第行釋菜禮過三里者仍舊制

正統時巡按福建監察御史鄭顥等奏琉球國通事沈志良使者阿晉斯古駕船載瓷器等物往爪哇國買胡椒蘇木等物至東影山

遭風桅折進港脩理妄稱進貢今已拘收人  
船將前項物貨并護船器械發福州府大儲  
庫收頓聽候

英宗曰遠人宜加撫綏況遇險失所尤可矜憐  
其悉以原收器物給之聽自備物料修船完  
日催促起程回還本國

○正統七年正月鴻臚卿楊善奏孟春享太  
廟賜陪祀官胙應臣等引奏謝恩其光祿寺  
卿奈亨不預報知法當究問亨奏舊制大祀

天地及祭 太廟社稷省牲省牲官復命俱在百官行禮之先今孟春享 太廟楊善止容 天地壇省牲官於奉天殿復命俟百官行禮畢方令 太廟省牲官於奉天門復命事屬紊亂乞治其不敬罪

英宗兩釋之至是善復移文禮部言亨不由儒業發身不諳 祖宗制度妄加訾議乞考定申明尚書胡濬等議奏自今省牲省牲及欽遣祭旗纛等神凡遇 聖駕陞殿俱於殿中

復命若御奉天門視事亦於百官未行禮之先復命從之著爲令

○舊制朔望各衙門堂上官皆支光祿寺酒饌正統七年以光祿寺卿柰亨言始罷之著爲

令

○正統間尚膳監內使王彰章參等盜用椒果等物事覺枷號于光祿寺門示衆

○太僕寺乃舊兵部初寺署卑隘寺臣言請俟建六部完以舊兵部爲寺許之

○正統時山西太原左衛卒張敬言頃者山西獲賊官校之陞多非實功有所司受賂陰與擒獲者有私賂獄賊誣平民於官後乃擒獲者有市他人所獲爲已擒獲者夫賞當功則臣下勸罰當罪則姦邪息此屬雖給朝廷得官然衆耳目不可塗也臣恐天下皆然宜令公廉御史究之削其冒陞之職重寘于法則奔競之路塞公正之門開人人務立實功矣都察院議宜行敬言于天下從之按此疏最

中今日之弊

○正統間江西所造九龍九鳳膳亭及龍鳳白  
堯礮俱不及式工部請治提調官罪復令改  
造

英宗恐勞民詔勿改造提調官宥之

○工部尚書吳中山東武城人有材能然惟聲  
色貨利是好寵妾數十甚畏其妻嘗領誥命  
妻命左右誦之畢曰此文天子自爲乎儒  
臣代草乎曰亦儒臣代草耳妻曰代草甚當

今誦之終篇何嘗有一清有一廉字中不敢怒夫居官不廉乃爲婦人所誚亦足羞矣

○正統間大學士楊士奇言臣蒙先朝贈臣

祖公榮爲少傅祖母胡氏爲夫人恩至渥也

但念父子將寔伯祖公辰伯祖母嚴所出繼公

榮後今公辰嗣絕臣秉承其祀伏見前代人

臣多得乞封旁親國朝惟有封贈親生祖

父母之制無及旁親之令今公辰雖於臣稱

爲伯祖嚴氏稱爲伯祖母寔臣親祖父母非

其餘旁親之比伏望 聖仁不循常例臣本  
身及妻卽今所得詰命移贈伯祖公辰伯祖  
母嚴氏俾得沾恩光顯無窮不勝惓惓祈恩  
之至

英宗命并予之

○福建尤溪縣銀屏山自永樂間縣民朱得立  
開採納銀宣德間設官局後奉詔書罷局封  
坑而坑首額戶猶照舊納銀布按二司以爲

言

英宗曰生財有道不在坑冶況厲民以爲益乎  
其卽罷之

○正統時陝西管糧叅政年富奏各處進貢馬  
無應付事例

英宗命每匹日給料豆四升草一束

○正統時御史時紀往陝西枉道回家娶妾

英宗聞之詔逮紀下獄仍諭三法司曰朝廷以  
紀綱爲首御史職紀綱之任不可不慎擇也  
如監察御史時紀因差往陝西枉道回家及

與長垣縣縣丞蕭節之夤緣交結挾勢娶民  
間女子爲妾背違禮法有玷風紀已付法司  
問罪自今爾等差官出外必精選知禮義廉  
耻明達大體無貪汚淫穢之行然後遣之仍  
嚴加戒飭庶幾紀綱以正不辱朝廷之使命  
如所遣及在任敢有不遵戒飭違禮犯法者  
爾堂上官卽具實舉奏以憑降黜若堂上官  
徇情黨比以致賢否混淆曠職廢事并罪不

宥

○正統時御史彭勗言郡縣守令凡遇水旱災傷處勘覆之勞匿不以聞間有上陳者部司又以國用不敷不爲停免糧稅以致凍餒貧困流離轉徙臣於鳳陽潁川一帶所見逃民動以萬計扶老携幼風棲露宿詢其所自皆真定保定山東諸處之民比因累歲荒歉稅糧孳牧逋負者多不能陪納有司不量民情又且責償遠年賑濟糧米饑窘日切筆楚日加若不轉徙何以自存乞朝廷議其便利凡

天下旱澇之處一應應徵錢糧鹽鈔并孳牧雜辦賑濟倉糧悉皆停免仍取勘缺食之人不問土著流移驗口賑給其守令功績必考其戶口增減以爲殿最則有司必勤於撫字生民必得其安養不負列聖保邦制治之仁矣

英宗從其言命有司行之

○正統八年勅雲南大理府知府劉烈曰以爾廉平公正命長郡治爾宜體朝廷簡拔之意

益勵乃操益勤乃事表率官屬宣布德澤愛恤吾民審度人情因俗爲治利所當興弊所當革盡心盡力必使一郡之民衣食克足禮教興行斯爾之稱所屬官員果有貪淫不法蠹政害民情狀昭著者五品以上具實奏聞其餘爾卽提下差人解京其有罷軟老疾不勝任者亦開具奏來察佐官及所在衛所官或倚恃豪強非分害民明指實跡奏聞一應公差之人但有生事需索爲民患者卽舉問

如例

○正統時大理寺奏律載竊盜初犯刺右臂再犯刺左臂三犯絞今竊盜遇赦再犯者咸坐以初犯或重刺右臂或不刺請定例章下三法司議刺右遇赦再犯者刺左刺左遇赦又犯者不刺立案備照赦後三犯者絞

英宗曰律爲常法赦乃一時恩典自今竊盜已刺遇赦再犯者依常例擬不論赦仍通具前後所犯以聞

○正統時刑部強盜越獄下尚書王質等於都察院鞫問獄具

英宗命杖提牢主事王彰司獄王溫等謫戍威遠黜巡風主事王儉爲民降尚書王質爲戶部右侍郎左侍郎郭瑾爲潯州府知府其原問郎中等官以不早歸結各降黜之

○正統八年興平王尚旃奏臣長子志棟蒙恩賜一品冠服乞并給與祿米供贍戶部言

皇明祖訓無郡王長子支給祿米例

英宗曰祖訓所當遵守吾豈儉於親親邪遂止  
不給

○正統八年勅諭內官內使三祖宗舊制內官  
內使職掌內府事務纖毫不敢透漏今爾等  
有不遵法度與在外各衙門官員私相交結  
透漏事情或因公務營幹已私或徇私情請  
求囑託公事或借撥軍夫役使以致所司那  
移選法出入刑名重勞軍民妨廢公道已往  
之事悉置不問自今宜相戒飭謹遵法度其

有徇情違法者必罪不宥

○正統時內使張環顧忠匿名寫誹謗語事

英宗命磔於市令內官俱出觀之

○正統間廣東海南衛指揮使以進表至京

媚事覺謫戍威遠衛

○慶成宴帶俸官不得坐正統九年春宴帶俸  
指揮使李春指揮僉事王福不應與宴入席  
攏坐爲禮部所劾下法司論罪

○正統時安定衛國師攝刺藏卜等以朝貢至

京各市茶二千斤又奏安定王令市茶三千斤回用乞賜車輛糗糧

英宗以茶數過多詔允安定王五百斤官爲運去其國師二百斤徒衆人一百斤俱令自募人運仍命禮部著爲令

○正統時府軍前衛指揮僉事鹿麟受枉法贓賣放操軍三十九名事覺

英宗命以百斤枷枷於教場號令仍發遼東鐵嶺衛充軍後有犯者悉准此例

○正統九年勅戶部曰朝廷令人易納馬草開中鹽糧本期資國便民比聞各場納草之人多係官豪勢要及該管內外官貪圖重利令子姪家人伴當假托軍民出名承納又行囑託規從輕省之處如東直門牛房歲計用草止十五萬今添納至三十餘萬積聚既多久則必致下人乘隙侵欺又各處所中鹽糧亦係官豪勢要之家占中居多往往挾勢將雜糙米上倉該管官司畏避權勢輒與收受以

致給軍多不堪用及至支鹽又囑管鹽官攬  
越關支倍取利息致無勢客商守支年久不  
能得者有之喪貲失業嗟怨莫伸其弊不可  
勝言此皆爾等不能體國利人循情受囑之  
故今姑宥爾等之罪以後必須嚴謹禁約草  
聽殷實軍民承納御史監收但作弊者卽拿  
問具奏官豪勢要及該管官員之家不許仍  
前承納與民爭利違者聽御史舉劾各場務  
會計歲用之數撥納果有多餘設法另行堆

積以備支用毋得濫收作弊各處中納鹽糧務要乾圓潔淨敢有仍前挾勢將雜糧米上倉及該管官司聽囑收受者聽巡按御史及提督官拏問情重者具奏處治御史提督官縱容不舉者并治以罪

○京民有受財教唆捏寫誣告平民者刑部奏雖稱教唆不係越訴

英宗命充軍後有犯者悉准此例

○初洪武間福建各場歲課銀二千六百七十

餘兩浙江歲課二千八百七十餘兩永樂間  
福建增至三萬二千八百餘兩浙江增至八  
萬二千七十餘兩宣德間福建又增至四萬  
二百七十餘兩浙江又增至九萬四千四十  
餘兩自是地方竭而民不堪矣

英宗初卽位下詔封坑冶民大蘇息至是有盜  
礦脈相鬭殺者御史孫毓福建叅政宋彰浙  
江叅政俞士悅各言復開銀場則利歸於上  
而盜無所容事下二處三司議福建三司附

言浙江按察使軒輓等奏曰復開銀場雖一時之利然凡百器具皆出民間恐有司橫加科斂人心搖動其患尤深爲今之計莫若擇官典守嚴加禁捕則盜息矣朝廷是輓言已而刑科給事中陳傅復請開場中貴與言利之官相與附和乃命戶部侍郎王質徃經理令福建歲課銀二萬一千一百二十餘兩浙江歲課四萬一千七十餘兩蓋比宣德時減半而比洪武時已十倍矣至於內外官屬供

億之費殆過公稅厥後民困而盜益衆至正統十四年王師戡定民始安戢云

○舊制稅課司局官攢不給俸日令巡攔供給正統九年山西太原府稅課司巡攏言其所收鈔少供給太重

英宗命各處官攢悉照資品給俸革其供給後河泊所官亦照此例

正統九年閏七月勅諭雲南總兵官左都督沐昂等曰得奏言銀坑年遠壘塌卽令軍民

缺食用人採辦有妨屯守然朝廷重在恤人  
利非所計頃因言者以雲南罷赦慮軍資民  
食不給欲因山川之利以資官民之用今爾  
等具言地利人情如此所得不償所費朕聞  
之惻然勑至卽如舊停止與民休息

○正統時大理寺卿俞士悅等言例文職受財  
枉法滿貫當絞者充軍其不滿貫者俱贖罪  
爲民武職出百死一生得官今坐流徒杖者  
槩充軍則前功盡棄而罪反重於文職乞令

武職受贓私縱操卒滿貫當死者充軍其餘  
不滿貫當流徒杖者如舊贖罪還職則不惟  
優待武臣抑且寬卹刑典從之

顯陵神宮監右少監阮菊擅伐陵樹百餘株  
私用事覺

英宗命斬之

○正統十年正月科道官劾奏公侯駙馬都督  
魏國公徐顯宗等二十八人懶慢不朝請治  
以罪

英宗曰大臣者小臣之表率大臣既皆偷安不朝小臣何所規法命跪於午門前以媿之

○正統十年

英宗召禮部尚書胡濱等諭之曰洪武以來寺院庵觀已有定額近年往往私自創建勞擾軍民其嚴加禁約除以前蓋造者遇有損壞許令修理今後不許創建敢有故違者所在風憲官執問治以重罪若縱容不問一體究治不宥

正統時平鄉伯陳懷奏山西行都司都指揮  
僉事吳浩膽略超異武藝精熟乞取到京擢  
用

英宗曰吳浩有膽略材武正可保障邊隅有功  
之日朝廷自任用之不必取來因謂兵部尚  
書徐晞等曰自今在邊有材略者毋得輒動  
著爲例

○京師城垣其外舊固以甃石內惟土築遇雨  
輒頽毀至是命太監阮安成國公朱勇修葺

伯沈榮尚書王菴侍郎王佑督工脩覽之  
英宗嘗謂吏部尚書王直等曰給事中以封駁  
糾劾爲職不徒侍從而已故居是職非得行  
檢莊飭才識優長儀貌豐偉語言端正者其  
曷克稱今後務慎其選毋視常輕畀庶言職  
得人有裨於治

(一)正統時大同叅將石亨奏國家設法推舉武  
職誠當矣然通於兵法者止是記誦之學熟  
於弓馬者不過匹夫之勇臨敵致勝未必皆

得其用況人之智謀在心未曾試用莫得而知所以漢唐以來皆設軍謀宏遠知識絕論等科令其各陳所能應詔如趙充國以良家子應募郭子儀以武舉自進設使當時拘於保舉豈能得二人之用哉今後乞許其自陳起取試驗果有可取令於各邊總兵官處謀議果能措置得宜實有功効然後不次陞擢之則得實才爲國爪牙矣

英宗善其言且命兵部凡有舉薦及自陳者具

名奏聞定奪非奉明文起取者不許擅離職役

○正統時陝西副使陳疑先奉勅赴陝西提督水利行至臨清聞喪以敕付縣官奏繳徑回原籍守制至是通政司奏疑不面白取旨擅自奔喪宜治罪

英宗曰疑誠有罪然子聞母喪情迫於內觀過知仁其宥之

○正統時福建復開銀場賊首葉宗留等率衆

稱亂巡按御史請於處州建寧等處各除撫  
民官一員且調福建兵擒剿浙江兵策應奏  
下戶部請令廷臣會議

英宗曰此何必議止盜莫如擇人誠得其人賊  
可平矣府縣添設官准其請務選賢者任之  
使盜息民安浙江官軍可不調蓋採礦皆小  
民失業所爲今宥罪令復業理當退散若復  
不敢然後調軍則彼伏辜而朝廷亦不傷好  
生之德矣遂命戶部郎中楊諶同巡按福建

監察御史理其事仍命都察院揭榜于各銀場曉諭

○舊制立春順天府官四拜進春後復四拜畢文武百官行五拜三叩頭賀禮正統十一年正旦日立春禮部言二節同一日宜殺立春禮順天府官四拜進春後文武百官卽入班行賀正旦禮從之

○正統十一年有僧四人私建寺於彰義門外爲御史林廷舉所奏

英宗特命發邊衛兗軍

○北京試院乃舊禮部正統時以今禮部成始改舊署爲試院初修時計屋八十二間

○正統十二年春

英宗謂工部臣曰官民服式舊有定制今聞有借用織綉蟒龍飛魚斗牛及違禁花樣者爾工部其通諭之此後敢有仍蹈前非者工匠處斬家口發兌邊軍服用之人重罪不宥  
○正統時彌陀寺僧奏本寺原種宛平縣土城

卷之三  
三五二  
外地十八頃有奇近蒙戶部委官踏勘令臣輸稅然臣空寂之徒乞賜蠲免

英宗曰僧既不能輸稅其地令沒官

英宗御奉天門早朝退諭禮部尚書胡濱等曰朝廷人材須要作養方獲實用今命翰林院侍讀等官杜寧裴綸劉儼商輅江淵陳文楊昌呂原劉俊王玉每日俱在東閣進學作文仍令學士曹鼐陳循馬愉嚴督考試務期成效凡會講時輪流經筵侍班治事

○正統時曾勅禮部曰擅留閻者朝廷具有著  
令日者太監喜寧乃敢私收役使縱令生事  
擾人已勅法司擒問如律爾禮部其移文申  
諭內外一切官員人等有私收者許卽連人  
首送俱宥不問匿而不舉及自後弗悛者或  
因事暴露或爲人所覺俱重罪不宥

○正統時閩縣知縣陳敏政條陳時政內一欵  
言大明律娶同母異父姊妹者以姦論並離  
異近見世俗之人有以後妻所携前夫之女

爲子婦者有以後妻所携前夫之男爲女婿者不惟兄妹男女之別不明亦且父母舅姑之名不正乞今後若此依娶同母異父姊妹律減等科斷庶有以別男女而厚風俗

英宗從其言

正統時永興王志墮奏臣父永興王嫡母高氏生母馬氏先後薨逝俱蒙遣官致祭造墳安葬但平日行實未曾傳述恐日久淪沒子孫無聞乞勅翰林院謨文以志俾存沒有光

英宗以親親之義特從其請

○舊制贈官無贈兩官者正統十二年禮部右侍郎馬愉卒贈禮部尚書兼翰林院學士贈兩官自愉始

○南京北極出地三十六度北京出地四十度  
强南京冬至日出辰初初刻入申正四刻夜  
刻五十九夏至日出寅正四刻入戌初初刻  
晝刻五十九北京冬至日出辰初一刻入申  
正二刻夜刻六十二夏至日出寅正二刻入

戌初一刻晝刻六十二其不同如此

○郭璡爲福建叅議時年二十四人呼爲小方

面

○正統時江陵縣歲貢生員張棨以內府考試懷挾文字

英宗曰此輩若處以常律不足以警後其謫戍邊衛逃則殺之著爲令

○正統時給事中張固奏釋教以慈悲清淨爲本爲其徒者當寡欲持戒豈期無賴貪饕載

佛像於街市鄉村鳴鑼擊鼓無端誕說惑世誣民乞勅巡視御史及五城兵馬緝拿究罪從之

○正統時給事中張匿言六科都左右給事中多缺員乞選各科年深者以次陞補

英宗謂吏部臣曰給事中乃近侍之官凡朝廷政令得失軍民休戚百官邪慝舉得言之況都左右給事中爲之領袖非識達大體者不可畀也固乃欲循資而用之不亦泛乎

正統時內使金榮等三人變其衣帽潛出禁  
門至密雲縣青洞口內剃髮爲僧被緝事人  
擒獲錦衣衛鞫實以聞

英宗命誅之

英宗謂兵部臣曰朕自卽位以來慄慄以奉天  
安民爲心累頒詔勅省刑赦罪輕徭薄賦凡  
可以寬恤民者無所不用其心又戒飭官吏  
非奉朝廷明文一夫不許濫役一毫不容擅  
科期在休息天下共享太平之福比者鄧茂

七等聚衆爲盜所司請發大軍勦捕朕雖遣將調兵然猶慮其出於不得已必有激變之者屢遣御史齎勅揭榜丁寧撫諭庶保全之今茂七等果有悔禍之心躬於延平城下輸情訴冤自求生路且乞蠲免徭役三年御史張海等以聞朕悉從之仍敕海等明正官吏激變之罪爾兵部可備朕言於榜以曉諭之俾其知國家以仁育萬民以大信布天下榜文至日不分罪犯輕重但能洗心改過卽日

退散者俱貸其死仍免其徭役三年凡逾年  
逋負悉免追徵官吏人等敢有違詔侵害之  
者治以重罪如榜文已到尚且首鼠兩端或  
仍前結聚或逃匿山林必撲滅之不赦

英宗諭禮部尚書胡濱等曰宗室國之至親近  
聞內外官員有以事至王府者多方需索以  
致窘迫自今使臣至者止許待以酒饌餘物  
一毫勿與之若有仍前需索者三司并巡按  
御史體實來聞不分內外大小官員人等正

犯處死全家發戍邊方其三司御史知而容  
隱者治以重罪爾卽移文各衙門官員人等  
一體知悉

○正統十三年朵林山衛野人女直頭目朝貢  
到館徑出街市強奪民貨且毆傷館夫爲會  
同館官所奏

英宗曰朝廷懷柔遠人加恩優待此輩不體恩  
意違法擾人令都指揮昌英等於會同館追  
問違法者人杖三十今後來朝貢者賞賜後

方令於街市買賣五日永爲定制敢有恃恩  
玩法者重罪不宥

○正統十四年兵部重定官員合用皂隸之數  
文職一品二品十二名三品十名四品六名  
五品六品四名七品至九品二名內翰林院  
編脩檢討六科給事中中書舍人監察御史  
俱近侍各添一名國子監博士助教學正學  
錄翰林院譯字官每員一名武職五府管事  
都督錦衣衛管事指揮鎮撫司管事鎮撫俱

照文官品級則例其各府帶俸都督各六名  
錦衣衛帶俸都指揮各四名長陵衛官係奉  
仁宗皇帝特恩指揮使指揮同知各六名指揮  
僉事四名各衙門公用六部都察院通政使  
司大理寺每處直堂三十名鴻臚寺翰林院  
每處直堂十五名宗人府太常寺國子監每  
處直堂十名詹事府太僕寺欽天監太醫院  
每處直堂六名光祿寺尚寶司六科中書科  
係內府衙門各用看朝房四名上林苑監行

人司每處直廳四名六部各司都察院各道  
大理寺左右二寺每處直廳四名刑部各司  
都察院各道大理左右二寺係理刑衙門每  
處把門二名都察院經歷司通政使司經歷  
司每處直廳四名戶部刑部都察院照磨所  
及各衙門司務廳每處直廳二名通政使司  
有奏訴冤枉人等戶部山西清吏司兵部職  
方武庫二清吏司俱有軍囚人等每處看監  
四名宗人府經歷司直廳二名詹事府主簿

廳直廳一名鴻臚寺司賓署司儀署主簿廳  
太常寺博士廳太僉寺主簿廳各二名欽天  
監主簿廳二名看書五名觀星臺把門四名  
國子監繩愆廳直廳三名與簿廳直廳二名  
刑部看監舊有一百三十九名都察院看監  
舊有一百二十八名五軍都督府直堂各舊  
有八名各府經歷司直廳各舊有四名錦衣  
衛直堂二十名鎮撫司直廳舊有五名看監  
舊有二十二名經歷司直廳舊有四名俱各

照舊不動在外司府州縣官員跟用且隸合  
照在京官員品職額數僉撥

英宗曰國子監博士助教學正等官係教訓生  
徒官每員與二名知縣系親民正官每員與  
四名如有仍前多僉者令巡按御史及按察  
司官挨究依律懲治

英宗謂兵部臣曰朕臨御以來祇體天地 祖  
宗之心誕敷寬恤仁民之政輕徭役慎刑罰  
蠲逋負一切不急之務悉已停止期所司敷

宣德意撫字黎元臻于治化邇者浙江處州等處小民嘯聚劫掠已命將率兵征勦今御史具以小民所訴不得已結聚之情來聞朕覽之惻然聖人用法寧失不經仁義之師脅從罔治爾兵部其榜諭小民除首惡兇犯不赦外其餘脅從及爲官吏豪民激變爲盜者各回原籍悉宥前罪其戶下一切逋欠稅糧課皆與蠲免仍復其徭役三年公私債負不許逼抑徵索敢有挾私陷害者必重罪之所

司奉法循理推恩存恤俾各安生業副朕一  
視同仁之心

英宗謂吏部尚書王直曰放回官吏挾制官府  
交結害民者發口外充軍誘人爲非以致盜  
賊生發者本身梟首家屬發邊遠充軍爾吏  
部移文內外法司衙門遍諭有衆使知所警  
○正統時東城兵馬指揮范質坐事被枷司禮  
監內使邵智聰擅令校尉囑守枷卒俾少寬  
質事覺命斬智聰勿再覆

英宗謂禮部尚書胡濱等曰舊制僧道之數府四十州三十縣二十其行童度牒之請悉由里老并所司勘實方得申送近聞多不通本教及來歷不明之人妄報籍貫一槩冒請爾禮部卽行文諸司待三年後凡有應給牒者先令僧道衙門勘試申送該管有司審係額內并貫籍明白仍試其精通本教經典如行童令背法華等經并諸品經呪道童令背玉皇本行集等經并諸品科範番僧審通壇場

十面方許申送禮部覆試中式然後具奏請  
給敢有似前濫保事發其經由諸司官吏里  
老俱重罪不宥

○正統十四年刑部奏定各處生員若犯受贓  
姦盜冒籍科舉挾妓飲酒居喪娶妻妾等罪  
者南北直隸兗兩京國子監膳夫各布政  
司發克辭近儒學齋夫膳夫滿日原籍爲民

皇明典故紀聞卷十一

終